

延慶縣志

程芳辰題



民國十七年稅收

延慶縣志卷之六

忠節

易曰王臣蹇蹇匪躬之故事君者原貴致其身也故龍比張許
史艷稱之延慶雖邊隅然自北魏金元以及勝國忠烈之士光
耀異域者豈容湮沒況我

朝仁漸義摩駿人杰士後先輩興今志中悉備載之以動景行焉
劉亢渥中山人仕慕容垂爲廣寧太守魏主珪命王建將兵攻
燕上谷太守慕容麟棄城走亢渥曰不死封疆豈得爲人臣
耶率兵禦之力戰死

畢資倫縉山人從僕散阿海南征以奪梅林關功同知武昌軍

節度屯泗州興定五年宋龜山統制時青襲破泗州資倫自投城下不死宋軍執以見青青說之降資倫極口罵青知無降意乃下於獄鈴以鐵繩脇誘百方終不屈如是者十四年及蔡州破宋人以告資倫乃嘆曰吾無望矣容我一祭乃降耳宋人信之爲設祭江于祭畢伏地大哭乘其防解投江死宋人立祠祀之

侯進縉山人也世爲金望族代有名宦貞祐初元兵起金主徒汴父士溫早卒進隨母李氏寓宿州仕元帥府經歷累遷保靜軍節度副使後戰歿

侯慶縉山人節度副使侯進之弟也仕金萬夫長與兄進俱死

于陣

谷春京兆人都知監右少監右少監與指揮孫剛同守永寧明
正統十四年敵陷獨石馬營剛力戰死春方率所部來援聞
之奮曰人孰無死死沙場乃爲忠義鬼吾從剛地下矣力戰
不勝遂自縊死贈祭葬如剛例

向通隆慶衛人少知讀書每見古名將所建立輒歆慕欲效之
長承父廕爲衛指揮同知戍守永寧孫剛雲州之役通願往
從平賊已而賊衆圍我師數重勢不能敵乃隨剛死雲州亦
陷京泰元年詔遣禮部郎中白璧諭祭且廕其子爲將士勵
王敬隆慶衛人性孤介不苟交任指揮同知與永寧指揮張澄

王同遊學於學正李彝門下授孫吳兵法彝死後有言及者敬澄猶相顧涕泣不忘本也與軍政選二人居最己巳寇至雲州敬澄隨守備孫剛往戰敬澄與懷來百戶陳顯以身蔽剛四人皆戰死景泰三年並祀雲州義烈祠

張澄永寧指揮與王敬陳顯隨守備孫剛往援雲州皆戰死澄臨危尙手刃三人隨被害同祀義烈祠

孫剛由都指揮僉事守備永寧正統己巳賊寇獨石馬營守臣楊俊棄城遁賊陷獨石馬營遂及雲州剛率永寧兵援之至中途遇賊數萬計且戰且行我兵寡不能當陣陷剛死之上聞遣官諭祭加褒贈仍陞其子二級其諭祭文曰爾以英武

戍守邊隅遇賊捐軀率先赴難竟以死敵曾不少回眷此忠誠宜加旌異後葉文莊公奏建義烈祠祀之

黃堯臣右衛指揮使周四溝操守嘉靖庚申賊寇赤城臣奮激大呼直犯賊前鋒賊懼引去尋探知臣無援復合再戰臣中流矢死奏聞贈昭勇將軍

林旺延慶衛後所百戶素賦膽略諸酋忌之甲午賊犯石槽峪旺拒戰斬其首級奪其器械甚夥屢建勲績賊知其名日夜切齒丙午大驅敵北遇伏兵亡於八洞口奏聞賜旺姪璽爲本衛指揮僉事卹其家

解生原邊人任永寧叅將驍勇有謀略萬歷十六年率家丁六

十餘人直搗敵窟斬級四十顆官兵無損者敵皆畏服不敢
蒙異志後陞遼東陣亡於牆嶺奉諭祭廕一子入祀褒忠祠
張勛永寧衛人也以都指揮僉事充遊擊將軍正德九年六月
敵由野狐嶺入寇懷安天成得利去至秋八月復由膳房堡
入掠鎮城南下至順聖東西城及蔚廣勛率兵勦之至千家
營猝遇敵六七萬與戰十餘合敵少却其酋長奮罵其衆曰
不勝即吾自刎其頸爾等取首獻南軍也乃復擁衆攻圍勛
勢寡不支力戰而死時同死者有遊擊將軍倪鎮東城守備
田琦西城守備廉彪合十餘人紀功御史汪賜獨奏云張勛
之死比衆甚慘而勤王敵愾之忠尤非諸臣可比不有褒錄

其何以慰忠魂示後勸也疏入不報塋永寧城北十五里

張允永寧邑諸生嘉靖中敵入寇允避窖中被執竟不屈勢窮

自殺

賈士璋延慶州人順治初以貢生爲陝西宜君令時闖賊餘孽乘機倡亂攻宜君士璋力拒之城陷不屈死

贈按察司僉事廕一子入監

李之實延慶州人順治初以貢生爲江南睢寧縣訓導逆賊海時行倡亂攻城陷之實不屈被殺事平

贈國子監學錄

賈仕山西某縣令時有山賊王強倡亂破城入縣署索印

賈與子輔林不屈同時縊死後數年有邑人來牧延慶嘉父子之忠請於大憲上其事廕孫自立縣令職康熙五年銓奉天鐵嶺令

李夢淞後所千戶掌印嘉靖戊申九月己酉二月敵兩犯州境淞晝夜巡城厲衆保障大有勞績

萬繼先係省祭官居小河屯與大營堡州民王祥保守州境賊

至各斬賊首級

按李夢淞萬繼先王祥皆舊志所載雖未死於沙場亦可謂能忠於王事矣

孝友

生人之理莫過於孝常人之孝雖不能如聖人然就此一念而充之以盡其量則亦何異于聖人故曰堯舜之道孝弟而已矣言乎盡人而可爲也爰作孝友志

陳顯祖甯城人也幼失恃每晨起必指靈筵薦食泣呼再三比長無一日間父仁性最嚴顯祖事之曲盡誠悃久之遂得歡心繼母于氏生四子父命析居顯泣諫不從乃以家資讓四弟自受其弊餘者父歿廬墓三年歸語母曰母知析居非顯祖意乎母曰然弟而父命之矣顯祖曰諸弟之資將竭行將凍餒兒忍獨溫飽乎請仍合之數十年雍睦無乖忤四弟亦

感悟克自樹立

李潤上谷寧人也家貧鬻餅自給母史氏年七十餘潤事奉盡禮每日候母起夫婦親侍盥櫛每食必侍立母食畢乃退自食出必告母始行母時或怒必長跪請杖母命起乃起拱立俟母霽色始退母寢疾累歲不愈潤刲股肉進之而愈金天興二年賜羊酒綿帛標其里閭

黃景隆慶人也居常以孝自勉事父母不違顏色父歿哀慟幾殞葬畢即居墓旁食粥衣衰聊以喘息終制始旋母梁歿亦如之後以其塚近水不能安親體魄改遷城南啓土見有松連理生樗首蟠結爲猿狖狀鄉士夫聞而嘆曰得非孝德之

徵乎相率爲詩文表著之且以諷其後人

趙安隆慶人也幼讀書以敦倫爲學父卒哀毀過甚廬墓三年食蔬飲水聊以存生後爲夏津主簿念母老上書當道求終養歸歸一年母病卒安復廬墓久之鴉鵲馴擾聲鳴極悲若助哀然三年始旋明嘉靖辛卯有司以聞旌其閭

孟周隆慶人也幼穎悟入州庠爲弟子明嘉靖戊申秋九月敵入寇周讀書州城聞賊圍八里庄堡駭曰吾父在得無罹其阨乎乃挺身往掄擊一二賊力不能勝被執大罵而死學官諸弟子列狀聞監司監司嘆曰此一死也於爲國忠於親爲孝可以風諸後令州守作木主祀之鄉賢祠

孟言周之伯叔兄弟也同周讀書城居同往掾親同時死于賊曹銓岔道人其父曹二爲敵所執銓往救父得免銓死焉

孟暘孟時居八里庄賊至或曰盍避諸二人曰吾父母宗族悉在此吾何往焉皆死於賊

段伯奎段老哥子居小店屯其父志卿被賊執乃竭死力以脫父子難而二人皆死焉

曹銳隆慶人也爲州庠生年二十負忠孝大志嘉靖戊午三月賊圍曹官營銳肄業學舍突出救母被賊執令降之銳嚼舌噴罵曰我讀書學忠孝而肯從爾苟生耶賊怒及之賊退家人收其屍猶見有奮怒色時人謂死於綱常死得其所矣

劉環左衛指揮僉事幼失怙事母溫清惟謹色養始終如一鄉人稱其孝

張良文永寧人以耆德蒙恩例授榮壽官居家孝弟在鄉黨有王彥方遺風與其弟良武良能和敬雍睦白首無間言俱以厚德鄉評推重當事扁其門曰伯仲孝友良武於母歿時廬墓三年大冢宰以純孝旌之

李眞州之西辛堡人李天祿之子天祿有過當杖直匍匐號泣求代受杖訖怡然而出曰幸老父不受刑也時人稱孝焉張燦延慶州人先人四世俱同居至燦兄弟六人孝友和睦凡財帛出入尤彼此不計多寡其娣姒亦皆感化相親愛無間

言壽各六七十杖履逍遙爲鄉人所重

閻正陞永寧人雍正元年恩貢生與弟納陞皆失怙事繼母能盡孝兄弟友愛無間言爲鄉人所稱乾隆間督學使者劉公聞之旌其門曰士林模楷

李登雲永寧衛庠武生兄連雲郡庠生弟兄友愛父遺產千金恣兄所用至囊橐竭而登雲甘受饑寒略無間言鄉評多之王之瑤永寧人少孤家貧事孀母備極其孝順意承顏略無懈怠色竭力甘旨撫幼弟盡友愛士人或有所不逮焉

解元吉延慶州貢生父解培以明經秉鐸順義縣重義好施爲鄉人所推許元吉素稟庭訓而天性孝友父因終養解組家

居寢疾十有八年元吉侍饘進藥晝夜弗違殆父歿歸窆後
間日必往拜如事生禮畢泣而返如此者三年事孀母趙氏
猶事父色養承歡愈謹人咸稱孝焉

劉克明府庠生幼失恃邊氏賴祖母鞠育之有繼母孟氏克明
事之維謹家甚貧孟病蠱醫藥飲食克明竭力奉給略不聞
于父有幼弟孟疾不能乳又無力覓乳媼父命出爲人後克
明不忍且慮傷母意私白母曰兒當竭力謀乳以哺幼弟但
恐違父命陽爲出繼暫令寄養可耳母亦感泣母病蠱得淡
食可愈克明遂同母淡食百日母病愈年餘幼弟離乳携歸
父始知之撫克明背曰汝誠孝友哉父母兄弟一門雍睦鄉